

СЭРТТОН-ПЕРТЧОН

## 12 кылбур

Маин пöртэм луо З. Рябининалэн но Ф. Васильевлэн толэзёс сярись сузётьёссы

Елена РЕЛИНА

**Литератураын вань туж тунсыко сям: месяцесловёсты кылдыгон. Ваче пумит пуктыса, учкомы Флор Васильевлэсь но Зинаида Рябининалэсь толэзёссы сйзем кылбурёссэс.**

С. Ожеговлэн кыллюкамьсытыз учконо ке, месяцеслов - со черкысь вöсьяскон книга, кытын толэзёсын-нуналёсын сөтйсько дунчылкыт адямиослэн нимёссы, улэм-вылэмзы, кычө нуналэ соосты буре ваёно, озьы ик отысь шедьтыны луоз вöсьяскон кылёсты но черк праздникёсты. Чапак та сям бордысь ик потйз поэтической месяцесловёсты кылдыгон но.

Куткомы Флор Васильевлэн «Толэзё бöрсый ортчоз толэзё, уд шöды ортчемзэ арлэсь» сузётьсен. Татысь милыдзискомы толэзёссы сйзем 12 кылбур. Кылсуредёсты учконо ке, валаны луэ: автор туж юн герзаскемын фольклорен, инкуазен. Лирической герой инкуазьлэсь чеберлыксэ возматйны тырше, аслэсьтыз пуш дуннезэ уг усъты - со инкуазь шоры паланысен гинэ учке кадь.

Флор Васильевлэн кылбурёсызлэсь чылкак пöртэмесь луо Зинаида Рябининалэн «12 суред» сузётьсытыз чурёс. Вераны кулэ, удмурт литератураын та нырысетйез нылкышно месяцеслов. Кылбурёсын инкуазь ме́чак суредамын öвöл, татысь ми шöдйськом лирической героинялэсь мылкыдёссэ, шугсекытёссэ. Со герзаскемын дырен, литературалэн куронтьёсыныз. Туннэ бадзым карын улысь нылкышно сокем уг ни адзй инкуазьлэсь



чеберлыксэ, сое золгес сюлмаськытэ аслаз улонэз. «12 суредын» лирической героиня лулпушэс усътэ, кышка-тэк вера, ма солы уг кельшы сюлмаськонтьёсын пачылмем улоньын.

### З. Рябининалэн «Март» кылбурез:

*Укыр гольтрес но огкадь:  
Мимоза, торт, пöян.  
Мар кышнолы кыле на:  
Тайеез коть вань.*

Та кылбурын шöдйське лэчыт сарказм. Лирической героиня Нылкышноослэн нуналзы шоры аспöртэм учке. Воргоронтьёс та нуналэ

Суредаз Л. Прозоров. Басьтэмын Ф. Васильевлэн «Ойдо вераськом» кылбур сборникысьтыз.

гинэ кышноослы сяскаос но зеч мылкыд кузьманы тыршо, нош поэссалэн малпамезъя, нылкышноослы таёе саклык котькуд нунал висьяны кулэ.

### Чошатома Ф. Васильевлэн «Ош толэзё»\* кылбуреныз:

*Бадпу шöдэм уни тулыс зынэз,  
Со зечыра шумпотыса.  
Пучы пушкын кыллись пинал куарез*

*Весь йыгаське  
куриськыса...*

Кылбур тулыс мылкыд пычатэ, сое лыдзёкы, шöдоно дыртйсь тулыслэсь шуныт зынэз, капчи төллэсь пельтэмзэ. Но со чылкак пöртэм луэ З. Рябининалэн вылий сөтэм кылбурезлэсь. Ф. Васильев тулыс инкуазь сярись маде ке, нылкышно кылбурчи - нылкышнолэн шудэз сярись.

### Ф. Васильевлэн «Юнны вуон толэзё» кылбурсытыз:

*Сюрес вылын кузё - дэри.  
Мöзмыт учко тырттэм лудтьёс.  
Кышкатыло уйшор төлтьёс,  
Шуныт куазьлэн дырыз быриз...*

Кычө тодмо милемлы та инкуазь суред! Автор быгатыса шудэ лыдзислэн мылкыдыныз, со вала, макем мур куректэ гуртысь мурт, кукле вуо кезытёс, лудтьёс тырттэм, нош писпуос гольык кылё.

### З. Рябининалэн «Октябрь» кылбурез:

*Пöсь уз лу ни.  
Кезыт но уз лу.  
Кузь плаце пазямын Дэриен.  
Кöлэм но уг поты.  
Улон но мöзмыт.  
Ура!  
Гажанэ... виноград*

Нош ик суредамын сйзбыл, но таяз вие - кар нылкышнолэн сингёсыныз. Инкуазез сяна, ми адзиском на лирической героинялэсь мөзмемзэ но мылкыдызлэсь возмьяскемзэ: виноградлы нылкышно туж шумпотйз, куректон мылкыдыз сылмиз.

### Ф. Васильевлэн «Шуркынмон толэзё» кылбурсытыз:

*Шур выльысь тулкымеэ  
кортнаны турттыса,  
Кезыт төл кот лымы  
сюлоен шачыръя.  
Лек төллэсь возжомем  
мылкыдзэ курласа,  
Ву дурьысь юг кызпу  
йырыныз мыкыръя...*

### З. Рябининалэн «Ноябрь» кылбурез:

*Сылыськом урамын,  
Кезытлэсь тэтчаса.  
Ог-огмес кылгёсын  
Шунтыны вырыса.  
Подъезд öс шоры  
Учырак учкылыса,  
Шунытын  
чупаськон сярись  
Малпаськыса.*

Кыкезлэн ик авторёслэн чурёсезы пычамын йö кадь кезыт төл, таёе суредёслэсь юзыр-кезыр лудыса кошконо. Но Ф. Васильев вера милемлы инкуазьлэн воштйськемез сярись, нош З. Рябинина пуш малпантьёссэ кыре поттэ, со тодаз вае одйг жытэз, кудйз пыраклы пычамын солэн солэмэз.

Озыен, та кылбурчиослэсь гурёссэс чошатоно ке, шедьтыны луэ одйг шöдскымон пöртэмлыксэс: З. Рябининалэн лирической героиня аслаз пуш дуннезэ сярись маде, нош Ф. Васильевлэнэз калык календарез но калык сямгёсты чакла. З. Рябинина котькуд кылбураз сарказм шапык куштэ, со серекъя улонэз, адямиослэсь сямгёссэс. Солэн лирической героиняез карын улысь нылкышно, месяцесловез солэн субъективной луэ. Озы вераны уг луы Ф. Васильевлэн сузётэз сярись, отын лирической герой - паланысен учкись. \*\*\*

\* - 1980-гй арёсысь орфография утемын

КУЗЕБАЙ ГЕРДЛЫ - 120 АР

## Шара мылкыд

Лариса ДМИТРИЕВА

**Арлы быдэ Кузубай Гердлэн вордскем нуналас Ижысь синпелетэз дорын кылбурёсэс лыдзö. Но уг тырмы кадь кылбурчилэн аслаз куарез, тросгес кылзэм потэ кылбурёсэс.**

Соин Гердлэсь куаразэ «чузьяськытон» понна Йоскалык библиотекаын 15-гй толшоре радъяськыиз потлэсь кылбурёсэс шара лыдзöн жыт. Ужрад азын ялэмын вал: мылкыд карисьёс, кылбур дасяса, мед лыктозы. Туала арын удмурт кылбурез вольыт лыдзöнлы

сйзем жытёс уг ортчыло, соин таёе вунэм амал асьме улонамы выль шöм пыртйз.

Тунсыко вал соиз: одйг кылбурез кöня ке мурт лыдзёны малпаса лыктэм. Литературоведтьёс Василий Ванюшев но Александр Шкляев бырийллям «Ми кизиском» кылбурез. Та кылбурлэн литератураын улон сюресэз туж тунсыко. Нимысьтыз сое эскеризы Василий Ванюшев, Анна Зуева-Измайлова, Алексей Ермолаев но мукет тодосчиос. В. Ванюшев пусйиз: со кылбурлэсь 3 вариантэ ик эскериз. Солэн малпамезъя, кылбурысь кизислэн обра-

зэз Евангелиысь тодмо притчаез тодэ вайытэ. Кузубай Гердлэн кизисез - югдытйсь, азъветлйсь, кылбурчи-проок, кудйз зарни кылгёссэ-кидыссэ калыклэн сюлмаз кизе.

Та жытэ А. Шкляев но В. Ванюшев быдэстйзы Гердлэн асэныз зуч кылэ берыктэм «Ветру уйшора» но «Я ни разу не видел море...» кылбурёсэс но. Озы соос возматйзы Гердлэсь усто берыктйсь лудэмзэ, зуч кылын быгатыса гожьяськемзэ. Вераны кулэ, К. Гердлэн зуч кылэ берыктэм кылбурёсыныз нимысьтыз «Лирика» (1965) бичет но поттэмын.

Со сяна, жыт куспын 2 пол чузьяськыиз удмурт литератураысь яратонлы сйзем тужгес но чеберез кылбур - «Чагыр кышет». Сое лыдзёны Александр Шкляев но «Мынам Удмуртие» ТРК-ысь журналист Светлана Кибардина. Котькудйз кылбурез аслэсьтыз мылкыдзэ пыртйз - озыен, выль сямэн валэктйз текстэз. Огез лыдзёны интонация пыр возматйз яратонлэсь - чагыр кышетлэсь ышемзэ-бездэмзэ улоньысь огшоры югдурез выллем, кудйзлы öвöл пумитъяськено, сое каньылэн пумитаны но пушкад пычатёны кулэ. Мукетгыз суредаз кылбурысь

лирической геройлэсь яратон понна асэныз ачиз нюръяськемзэ но гажан мылкыдзэ ыштэмез понна зол куректэмзэ. Макем пöртэм пуштресо лубыны быгатэ шара лыдзём текст!

Жыт чоже пöртэм кылбурёс чузьяськызы - гражданской но философской лирика, басня, «Гондыръёс» нылши поэма. Кузубай Гердлэсь зарни чурёссэ кылзыса, сослэсь кужымзэс эшшо огпол дунъямы. Та жытын гань-гань учкисьёс öй вал - ваньзы пыриськызы поэзилэсь праздниксэ кылдытонэ, соин ужрад туж шуныт пöрмиз, калыкез огъяз. \*\*\*